

Kerajaan rancang tubuh Pusat Risikan-Geospasial Negara

KUALA LUMPUR 13 April - Kerajaan dalam perancangan untuk menubuhkan Pusat Risikan-Geospasial Negara sebagai langkah menyediakan risikan sistem maklumat geografi (GIS) kepada agensi-agensi keselamatan yang mengawal sempadan negara.

Menteri Sains, Teknologi dan Inovasi, Datuk Seri Madius Tanguau berkata, keperluan menubuhkan pusat itu adalah untuk memastikan insiden seperti pencerobohan di Lahad Datu, Sabah oleh pengganas Sulu pada 2013 tidak berulang.

“Pencerobohan di Sabah membuat kita berfikir semula bagaimana kita perlu menguruskan keselamatan negara pada masa

akan datang.

“Tambah pula dengan perkembangan terkini ancaman keselamatan serantau termasuk kewujudan kumpulan pengganas mendesak kita untuk mencari langkah-langkah baharu yang boleh diambil dalam memastikan negara dalam keadaan aman dan stabil,” katanya.

Beliau berkata demikian ketika berucap dalam majlis perasmian Persidangan dan Pameran Antarabangsa Geospasial dan Penderiaan Jauh 2016, di sini hari ini.

Yang turut hadir Presiden Institut Geospasial dan Penderiaan Jauh Malaysia (IGRSM), Prof. Madya Dr. Abdul Rashid Mohammed Shariff



MADIUS TANGAU

dan Timbalan Naib Canselor (Kajian dan Inovasi) Universiti Putra Malaysia (UPM), Prof. Datuk Dr. Mohd. Azmi Mohd. Lila.

Menurut Madius, Agensi Angkasa Negara (Angkasa) akan menjadi peneraju kepada beberapa agensi lain termasuk agensi keselamatan dalam kajian yang akan dibuat mengenai penubuhan Pusat Risikan-Geospasial Negara.

Beliau berkata, negara tidak boleh mengambil sikap sambil lewa lagi dengan keamanan yang dikecapi kini kerana hakikatnya geopolitik di luar sana berada dalam keadaan tidak menentu.

“Mentaliti bahawa kita kurang menerima ancaman adalah salah. Kita harus sentiasa bersiap sedia untuk menghadapi sebarang kemungkinan bagi memastikan kedaulatan dan kesejahteraan negara terus terjamin,” ujarnya.